

# Vuk'uzenzele

Uyethulelwa ngezokuThintana kukaRhulumente nokuNikela NgeLwazi (i-GCIS) English/IsiNdebele USinyikhaba 2022 umGadangiso 1

## Ihlelo Lokuhlomisa Abongazimbi Libuyisa Ithemba



Owen Mngadi

Ihlelo lokuHlomisa aboNgazimbi le-Thohoyandou (i-TVEP) linqophe ukubuyisa ithemba nokuthembeka ehlelweni lezomthethobulungiswa ngamagadango walo atjhubileko anqophe ukusiza abakhe bakhahlunyezwa yiNturhu eQothele bobuLili obuThileko (i-GBV) neyokukatwa ngokuba lethela isizo eliphathelene nokuthotjwa kwengqondo neendaba zomphakathi.

I-TVEP, eyasungulelwa e-Limpopo ematjhumini amabili weminyaka edluleleko, isebenzela esibhedlela i-Tshilidzini nesibhedlela i-Donald Fraser, ngaphasi kweThulamela Local Municipality. UmJaphethe womNqophisi u-Fhatuwani Manthada uthi ihlelweni linqophe ukuwuqeda nya umukghwa wokukhahlunyezwa ngokomseme, liqede ne-GBV kunye noku-khahlunyezwa kwabantwana ezakhamuzini ze-Thohoyandou, njengoba imilandu enje

kuyinto evamileko kilendawo. Uthi ngeenkhathi ezidluleleko iimbalobalo bezitjengisa ukuthi minengi imilandu yokukata e-Thohoyandou, kodwana-ke i-TVEP seyenze litho likhulu ukuphandlulula abantu nekuthobeni abantu ekukhahlumezekeni kwengqondo kobanyana kuzokuqedwa lomukghwa olikhwekhwe. Njengoba iphasi lizabe litjheje amaLanga ali-16 wokuLwa neNturhu eQothele abaNtu abaSikazi nabaNtwana ukusukela ngomhla wama-25 kuSinyikhaba ukuyokufika kumhla we-10 kuNobayeni, u-Manthada uthi ihlelo labeli liyaneliseka ngendima esele yenziwe ngokukhuthazwa kwezakhamuzi ukuthi zilemuke amalungelo wazo bezibike imilandu eyenzekako. “I-TVEP yemukela iinlilo ezihlangu nama-80 ne-100 zabongazimbi benturhu yomkhaya qobe yinyanga, ukube kanti imilandu yokukata ebikwa qobe yinyanga ihlangu kwama-45 nama-50,” kutjho u-Manthada. Emaziko walehlelo lapho

kutholakala khona koke okufunekako kukhona imihlobohlobo yesizo ekusizwa ngalo abongazimbi, eku-balwa hlangana nalo nesizo lezomthetho, ukuvikelwa kwabongazimbi ebakhahlumezini babo, ukulandelelwa kwemilandu esekhotho, ukuthotjwa kwengqondo nokuhlonyiswa ngamakghonofundwa, ngaleyindlela abongazimbi bathole ithuba lokuthoma phasi. U-Manthada uthi i-TVEP isebenza ngokubambisana namapholisa wakwa-SAPS, nomNyango wezePilo kunye nomNyango wezokuThuthukiswa komPhakathi ukukhanda abongazimbi ukuthi bangakhahlumezeki kwesibili nabavula umlandu wokukhahlunyezwa. “Emilandwini yokukata, abasebenzi abaqalelela zepilo namapholisa baya emaziko we-TVEP bayokusiza abongazimbi ukuvulela abakhahlumezi babo imilandu, bebabathobe nemikhumbulo,” utjho ahlathulula. I-TVEP ikwazi ukugcina abongazimbi bekube malanga

ali-14; kodwana-ke isikhathesi singangezelelwa emilandwini lapho kuthinteka khona umndeni wo ke namkha abantwana. “Sinesiqhenyana sokuhlomisa esikhamba sikhulumisana nomphakathi sifundise nabantu ngamalungelwabo. Sisebenzela izakhamuzi ezingaphezulu kwesigidi e-Thohoyandou namaphethelo. Siphumelele ukubuyisa ithemba kangokuthi kwanje abantu sebanethemba ekambisweni yezomthethobulungiswa wezobulelesi nemapholiseni,” kuhlathulula u-Manthada. I-TVEP ibuye yavulela nabantu abama-44 imisebenzi, abasebenza eminyangweni ngokwahlukahluka, njengemnyangweni wezeemali, wezabasebenzi kunye newezokuhlungwa. Nanyana beyisolo ithola imali ezii-R90 000 qobe kota emNyangweni wezokuThuthukiswa komPhakathi

Iyaraga ekhasini lesi-2



**SASSA encourages non-smart phone owners not to choose EFT payment method**

Page 5



**HLALAY UPHEPHILE**

JOVA UKUZE UHLENGE ISEWULA AFRIKA

NGOKUBAMBISANA SINGAYEHULULA INGOOWANA YE-CORONA



**Toilet paper business leaves man blushing with pride**

Page 12



Ukuze ufunde i- **Vuk'uzenzele** zitholele i-GOVAPP ku:



Funa u-SA Government ku-Google playstore nofana ku-appstore

**UNGASITHINTA LA**

Ubunzinzolwazi: [www.gcis.gov.za](http://www.gcis.gov.za) I-imeyili: [vukuzenzele@gcis.gov.za](mailto:vukuzenzele@gcis.gov.za)

[www.vukuzenzele.gov.za](http://www.vukuzenzele.gov.za) Umtato: (+27) 12 473 0303

**Tshedimosetso House:**  
1035 cnr Frances Baard and Festival streets, Hatfield, Pretoria, 0083

## Iraga isuka ekhasini loku-1

e-Limpopo, i-TVEP icatjha-  
zelwe yi-COVID-19 njengoba  
phela abasekeli ngeemali  
abanengi babuyele emva,  
ngaleyindlela kwaliyeka  
amahlelo wokusebenza  
wehlangano le.

Nokho-ke isiKhwama soku-  
Siza aboNgazimbi beNturhu  
eQothele bobuLili obuThileko  
nokuBulawa kwabaNtu  
abaSikazi (i-GBVF), esasu-  
ngulwa nguMengameli  
Cyril Ramaphosa, neKundla  
yaboMma yamaZwe nga-  
maZwe yeSewula Afrika

(i-*International Women's  
Forum of South Africa*) kunye  
nababelani bompha-  
kathi bakghonile ukuthi  
basize ihlelweli ngoMhlojana  
wanonyaka.

I-TVEP ibe hlangana  
neenhlango zokuthoma  
ezilwa ne-GBVF ukusekelwa  
ngeemali.

Ngemali eli-R128 lee-  
ngidi ebuthelwe ngemi-  
nikelo yekoro yangeqadi,  
nesikhwama samakoro  
ngamakoro, isiKhwama se-  
GBVF sizakusiza besisekele  
ukuphunyeleliswa komTla-  
mo weHlelo lamaQhinga  
weliZwe nge-GBVF.

I-TVEP yabelwe imali  
ema-R250 000 kilomnyaka  
weemali ophezulu, kanti-ke  
izakuthola enye imali ngo-  
mnyaka wee-2023.

U-Manthada uthi imali le  
yenze ukuthi i-TVEP ikghone  
ukwandisa abongazimbi  
ekghona ukufika kibo ibe-  
ikghone nokuthi ihlale ise-  
benza ihlangano le.

U-Murendeni Vhengani  
(oneminyaka ema-26) wahle-  
ngwa yi-TVEP ezandle  
ni zokukhahlunyezwa  
mumuntu akhe ezwana naye.  
Uhlezi iinyanga ezima-46  
nomntazanakhe weminyaka  
emine eziko le-TVEP ngemva


kokubaleka naye emuntwi-  
nakhe loyo.

Iziko lethu lamsiza ekubo-  
phiseni umuntu akhe ezwana  
naye wabe wenzisa nencwadi  
yomlayo wokuvikeleka  
kwakhe. Lisagwetjwa icala  
lomuntwakhe.

“Bangamukela ngezandla  
ezifuthumeleko ngemva  
kokutlhaga kwami iminya-  
ka eminengi. Ngazizwa  
ngiphephile. Sengibuyelwe  
mummoya wokuzithemba,”  
uyatjho.

USihlalo wesiKhwama se-  
GBVF, uDorh. Judy Dlamini  
uthi isalungiswa imali yoku-  
sekela iinhlango ezili-108

iimbawo zazo zokukhombela  
ukusekelwa ngeemali ezi-  
phumeleleko.

Izakumenyezelwa kunga  
sikade imininingwana  
yomunye umzombe woku-  
faka iimbawo zokusekelwa  
ngeemali; izakumenyezelwa  
kubunzinzolwazi be-GBVF  
Fund: <https://gbvf.org.za/>. 

*I-TVEP uyithola  
ngokuthintana  
no-Manthada eno-  
mborweni yefowuni  
ethi-064 771 5264  
namkha ku-imeyili:  
atj@tvep.org.za.*

# Zivulelwe iimbawo Ze-NSFAS Zomnyaka Ozako

**U**vuliwe umzombe  
wokufaka iimbawo  
zokufunda ngesi-  
Khwama seliZwelo seSizo  
leeMali zokuFunda (i-NSFAS)  
womnyaka wee-2023.

UNgqongqotjhe wezeFundo  
ePhakemeko, zeSayensi  
nezaMandla wokuSungula  
uDorh. Blade Nzimande wenze  
lesisimemezelo emhlanganweni  
wababikiindaba mhlapha.

UNgqongqotjhe uNzimande  
uthi isikhwamesi sibone ukuthi  
nonyaka isikhathi sokufakwa  
kweembawo sivulwe ngapha-  
mbi kwesikhathi ekuvamise  
ukuvulwa ngaso eminyakeni,  
kobanyana abafuna ukufaka  
iimbawo babe nesikhathi esa-  
neleko sokuthumela iimbawo  
zabo kunye nemitlolo eseke-  
lako.

UNgqongqotjhe uNzimande  
uthe nakethula umbiko woku-  
khibelela ngokusekela ngeemali  
kwe-NSFAS emnyakeni wee-  
2022 wathi kwabiwe imali  
engangama-R43 wamabhiliyoni  
ezakusetyenziselwa ukubhadela  
iimfundo zabaphumeleleko  
ukufundiswa sikhwamesi,  
nokubhadelela ukugoma,  
neendleko zokukhamba kunye  
neensetjenziswa zokufunda.

Uthi zima-985 672 iimbawo  
abazitholileko, kodwana ezili-  
140 636 zazo zangaphumelela.

Kileziimbawo abazitholileko,

ezima-739 526 zize zivunyiwe,  
kodwana kusalindeleke ukuthi  
abafundi bazo batloliswe  
emaziko wezefundo lapho  
bayokufunda khona.

“Ubunengi babafundi  
iimbawo zabo ezingakhange  
ziphumelele batlhayele ngo-  
bufakazi obufakazela isidingo  
sokusekelwa ngeemali; beqa  
isilinganiso semali esibekelwe  
umfundi ongafundiswa  
ngilesisikhwama; sebanee-  
ncwadi zefundo ezingaphezulu  
kwesilinganiso esiphezulu  
esibekiweko, kunye nokunga-  
khambisani neemfuneko  
zefundo zekoro yamakholeji  
we-TVET,” kuhlathulula  
uNgqongqotjhe uNzimande.

Ngokwemininingwana  
yobunzinzolwazi be-NSFAS,  
ukusukela ngomnyaka  
wefundo wee-2021, i-NSFAS  
ayisabasekeli ngeemali  
abafundi esele baneziq  
zokuthoma zefundo ephake-  
meko. Lapha-ke kukhulunywa  
ngeentifikethi zefundo ezi-  
fundelwa ngemva kokuthola  
iziqu zokuthoma, amadiploma  
atholakala ngemva kweziq  
zokuthoma, iziqu ze-honours,  
iziqu ze-masters kunye neziq  
ze-PhD.

Lokhu-ke kutjho ukuthi  
i-NSFAS iphelela eziqweni ze-  
*Bachelor's Degree* ukufundisa/  
ukusekela umfundi ngeemali.

## Senza Ihlelo Lokufaka iimbawo Libe Ngcono

Emzameni wokwenza ubu-  
ngcono nobulula ehlelweni  
lokufaka iimbawo ze-NSFAS,  
uNgqongqotjhe uNzimande  
uthi nonyaka i-NSFAS ifake  
ubungcono obunzinzwana  
ehlelweni ukwenzelela ukuthi  
umsebenzi wokwenza noku-  
faka isibawo ube lula khulu,  
ungabi noburhiyarihiya.

Uthi isizasithungelelanisi  
yesibawo se-NSFAS esenziwa-  
ngethungelelwano lezokuthi  
ntana sesitlanywe ngobutjha  
kobanyana sizokusebenziseka  
lula khudlwana besikhambe-  
lane namanye amaplatifomu  
abafaki beembawo abawa-  
jayekeko, njenge-*WhatsApp*,  
i-*Twitter*, i-*Facebook* kunye  
ne-*Instagram*.

“Umsebenzi wokwenza  
isibawo ngokwawo sewenziwe  
waba lula khulu, nemibuzo  
ebuzwa lapho ilula khulu  
ukuthi umphakathi uyizwe  
kuhle. Ngaphezu kwalokho,  
muva nje umfakisibawo  
selangakhona ukuthi selatho-  
mile ukusebenza ngesibawo  
sakhe akhokhe ummoya aje  
ajamajamile, abuye aragele  
phambili ngesibawo sakhe  
muva, ngaphandle kokutho-  
misa phasi, ukube kanti lokhu  
bekungenzeki esikhathini esi-  
dlulileko, utjho uyahlathulula.

“Ngaphezu kokwenziwa  
kobungcono, i-NSFAS  
seyingezelele nezinye  
iindlela zokwenza isibawo  
ezizakuqalelela abafakisibawo  
abakobunye ubujamo obuhlu-  
kahlukileko, ngokukhumbulela  
nokuthi ubunengi babafakisi-  
bawo bababantu abatjha esele  
basebenzisa iindlela zokuse-  
benza budijithali,” kungezelela  
uNgqongqotjhe uNzimande.

Iindlela ezitjha zifaka hlangana  
i-*Mobile App*, i-*USSD* kunye ne-  
*WhatsApp* la umuntu angenza  
khona isibawo sokufundiswa  
yi-NSFAS, bese ukghona  
nokulandelela ukuthi isibawo  
sakhe sijamephi (sikiliphi izinga  
lokusetjenzwa), abe akghone  
nokwenza isibawo sokukha-  
nsela, hlangana nokhunye –  
ekuyinto ebeyenziwa kwaphela  
ngesizasithungelelanisi sobu-  
nzinzolwazi.

Ukudlula lapho, ukuqi-  
nisekisa ukuthi akunamfa-  
kisibawo osalela ngemva,  
uNgqongqotjhe uNzimande  
uthi i-NSFAS izokuphuma  
ijima lokuvakatiyhela abantu,  
ukwenza isiqiniseko sokuthi  
abantu abanganazo iinse-  
tjenziswa zethekhnoloji  
abangenza ngazo iimbawo  
ngethungelelwano lezokuthi-  
ntana basizwa ngeensiza ezi-  
faneleko nesekele lokufaka  
iimbawo.

## Indlela Yokuthola Umfundalize We-NSFAS

Uvumelekile ukwenza isibawo  
sokufundiswa yi-NSFAS nayibe  
usisakhamuzi seSewula Afrika  
esilungiselela ukufunda ngo-  
mnyaka wee-2023 namkha vele  
sewuyafunda eyunivesithi yo-  
mbuso namkha ekholeji ye-TVET,  
begodu uzalisa imibandela nasi  
elandelako:

- Urhola isibonelelo se-SASSA namkha.
- Umrholo wenu uhlanga-  
ne awudluli ema-R350 000  
ngomnyaka.
- Nayibe umumuntu onoku-  
khubazeka, umrholo wenu  
sewuhlangene awudluli  
ku-R600 000 ngomnyaka.
- Nayibe umfundi othome  
ukufunda eyunivesithi nga-  
phambi komnyaka wee-2018  
begodu umrholwakho/  
wekhaya lakho awudlu-  
li ku-R122 000 ngomnyaka.

Iimbawo zokufundiswa yi-NSFAS  
zivala ngomhla wama-31 kuTjhi-  
rhweni wee-2023. [SAnews.gov.za](https://www.nsfas.org.za)

Vakatiyhela ubunzi-  
nzolwazi be-NSFAS ku:  
[www.nsfas.org.za](https://www.nsfas.org.za) uthole  
eminye imininingwana  
malungana nemitlolo  
efunekako yokusekela  
isibawo sakho.



**government  
communications**

Department:  
Government Communication and Information System  
REPUBLIC OF SOUTH AFRICA

Tel: 012 473 0353

Email: [vukuzenzele@gcis.gov.za](mailto:vukuzenzele@gcis.gov.za)

Address: Private Bag X745, Pretoria, 0001

### Head of Editorial and Production

Regomoditswe Mavimbela  
[Regomoditswe@gcis.gov.za](mailto:Regomoditswe@gcis.gov.za)

### Acting Editor-in-Chief

Zanele Mngadi | [Zanelemngadi@gcis.gov.za](mailto:Zanelemngadi@gcis.gov.za)

### Acting Managing Editor

Tendai Gonese | [tendai@gcis.gov.za](mailto:tendai@gcis.gov.za)

### News Editor

More Matshediso

### Graphic Designers

Tendai Gonese | Benny Kubjana

### Production Assistants

Jauhara Khan | Sebastian Palmer

### Language Practitioners

Nomgcibelo Motha | Boitumelo Phalatse  
Thandolunye Khulu | Mahanyele Ramapala



**Vuk'uzenzele**  
is published by Government  
Communications (GCIS)

Distributed by:  
**ON THE DOT**

Printed by:  
**ISING SUN PRINTERS**  
The Johannesburg Press

The material in this publication may be reproduced, distributed, or transmitted in any form or by any means, including photocopying, recording, or other electronic or mechanical methods, without the prior permission of the publisher on condition that this publication shall be credited as the source.





# Amathuba Wemisebenzi Newokuziphilisa Asigidi, Nokuya Phambili



**E**sikhathini esingaphasi kweminyaka emibili edlulileko sivule iHlelo le-Ofisi kaMengameli lokuKhuthaza ukuVulwa kwemiSebenzi, lokuvula imisebenzi nokusekela iindlela zokuziphilisa njengengcinye yokusekela ukuvuselelwa komnotho ngemva kwesifo esikhe sarhagala i-COVID-19.

IHlelo le-Ofisi kaMengameli lokuKhuthaza ukuVulwa kwemiSebenzi lisandufikelela esigidini sabanesandla kilo solo lisunguliwe.

Lesisilinganisoliqha esiqakathekileko simphumela wokuhlanganyela umsebenzi ngurhulumente nomphakathi ngokunaba kwawo, sekubalwa nekoro yangeqadi, neenhlango zomphakathi nabanye abanengi.

Ihlelweni solo litjhotjholoza njalo livulela abantu imisebenzi njengoba umnotho uthatha isikhathi ukuvuseleleka bewuvule imisebenzi ngesilinganisano esisifunako.

Njengoba sisebenzela ukuhlumisa umnotho ozakuletha imisebenzi emihle nebambelako ngobunengi, sizakusolo sakhelela phezu kwepumelelo yeHlelo le-Ofisi kaMengameli lokuKhuthaza ukuVulwa kwemiSebenzi, besikhulise nendima yalo. Lisafuneka khulu ukungezelela ukuvuseleleka kwema-

kethe yemisebenzi. Godu lisekela nokuvuseleleka komnotho ngeendlela eziqakathekileko.

Njengoba ilimuko lomsebenzi lisiqabo esikhulu kangaka nje ekutholakeni komsebenzi, amahlelo la eza nethuba lelimuko lomsebenzi lekhwalthi ephezulu.

Ehlelweni esingalinganisa ngalo, elingelikhulu kinawo woke elisekelwa ngilelilelo lokukhuthazwa kwemisebenzi, pheze bama-600 000 abantu abatjha abafakwe eenkolweni njengabasizi beenkolweni ezingaphezulu kwee-22 000 kilo loke ilizweli. Abaphathi beenkolo, abotitjhere/ abafundisi nabanye abahlanganyeli, boke bavumelana ngokuthi isandla esifakwe basizi beenkolweni sibenze baba ngcono khulu ubujamo bokufunda eenkolweni.

Abantu abanengi abazisebenzako bathole imithombo yabo yokuziphilisa iqintelswe ngilesisifo ebesirhagele. Ikoro yokuzithabisa nobugwali nakungiyi ibetheke khudlwana. Kilekoro abantu banikelwe isekelo kobanyana bazivulele imisebenzi bavulele nabanye. Iinthombe ezibukelwako, umvumo kunye nemidlalo yesiteyiji eveziweko kwanje seyi-kghona ukuzenzela enye imali ngokuthengiswa kwama-

lungelo, amathikithi kunye nangokuthengiswa kwemisebenzi eveziweko. Koke lokhu-ke kulisizo ekukhuliseni lekoru.

IHlelo le-Ofisi kaMengameli lokuKhuthaza ukuVulwa kwemiSebenzi lisekele nemithombo yokuziphilisa ebambelako. Bangaphezulu kwe-140 000 abosomaplasi abalimela/ abafuyela ukuziphilisa abathole amavawutjha wokuraga umsebenzabo kobanyana bazokukghona ukubuyela emsebenzini wabo babe bakghone nokuwukhulisa ngemva kokuqintelswa yi-COVID-19.

Omuniye walabo abathole lelisizo kube nguPhindile Ngcoya (oneminyaka ema-36) we-Richmond, KwaZulu-Natala. Ungomuniye wetjhumilamalunga webhizinisi ehlanganyelwe mndeni, kanti-ke uthi ivawutjha ayitholeleko le iyihlengile ibhizinisi yabo ehlanganyelweko esese yitja le, yabe yakghona nokwenza nemali.

IHlelo le-Ofisi kaMengameli lokuKhuthaza ukuVulwa kwemiSebenzi lisekela neemfundiswa ezineziqo zefundo, ngokuvulela abahlanganyeli amathuba, iimfundiswa zesayensi, ama-athizeni nezinye iimfundiswa. Ama-26 amayunivesithi asiza ukutholela iimfundiswa ezineziqo ezingasebenziko imisebenzi ekhambelana neencwadi zazo zefundo.

UmNyango wezeFundo nezaMandla wokuSungula uvule amahlelo wesayensi amanengi wezakhamuzi ezinekgghono lokusungula izinto ezitja, njenge-Duzi Umngeni Conservation Trust, yona eqatjhe ilutjha lendawo njengabaHlahlindlela bokuQalelela iBhoduluko kobanya-

na lizokuhlomisa umphakathi wendawo ukwazi ukuhlwenngisa nokuvuselela iindawo zamanzi wendawo. Elinye ihlelo elize nomNyango lisiza abosomabhizinisi ukutlama iimphakamiso zamabhizinisi emnothweni onganarhasi esilaphazako.

Amahlelo wokuqatjiswa komphakathi anobuhle obubuyisela umphakathi ngoba avula imisebenzi esiza umuntu woke. Malungana neHlelo le-Ofisi kaMengameli lokuKhuthaza ukuVulwa kwemiSebenzi, sibala nokuba ngcono kokufunda eenkolweni, nokwenza iindawo zabosomthlatjhana zibe ngcono, nokusekela abantu abakhahlunyezwe yinturhu eqothele bobulili obuthileko, ukulondwa kwemvelo nebhodululo kunye neendlela ezitja zokubuyekeza nokwenza ipahla esebenzileko ngobutjha.

IHlelo le-Ofisi kaMengameli lokuKhuthaza ukuVulwa kwemiSebenzi lavulelwa ukulwa nomraro wokuthogeka komsebenzi okwathuwelelwa yi-COVID-19.

Nanyana isifesi sesirhobbile nje, kodwana ukuthogeka komsebenzi khona akukarhobhi.

Ingeniso etholakele ngeHlelo le-Ofisi kaMengameli lokuKhuthaza ukuVulwa kwemiSebenzi ikhwezelele umnotho kibosomabhizinisi abancani nakibosomabhizinisi abangakahleleki emnothweni weendawo ngeendawo kilo loke ilizweli. Abasizi beenkolweni abasebenza eMgungundlovu imalabo bayisebenzisa eMgungundlovu. Kunjalo-ke nangebe-Putsonderwater.

Kunobanyana 'isuke phezulu ithontele phasi,' imali ifakwa ezandleni zomphakathi

oyidinge khulu. Imali leyo-ke izombezelela endaweni yangekhabetse 'iphakamela' emnothweni ngobubanzi bawo.

Kungakho-ke lelihlelo silibiza ngokuthi 'ngelokukhuthaza', ngoba umnotho woke uyazuza, ngokunjalo nomphakathi nawo uzuze.

NgeHlelo le-Ofisi kaMengameli lokuKhuthaza ukuVulwa kwemiSebenzi, sivule amandla, ukuzibophelela, amandla wokwakha, amandla wokusungula kunye nama-thuba. Kikho koke lokhu, sakha umphakathi osebenzako.

Bangaphezulu kwesigidi abantu abazuzileko. Banengi abanye abantu, emindenini nemphakathini yabantu abanesandla kilamahlelo abalizwileko igalelo lalesisi-Khuthazi.

Umsebenzi wethu nje-ke kukhulisa nokutjhingisa igalelo lalomsebenzi.

Ngenca yeHlelo le-Ofisi kaMengameli lokuKhuthaza ukuVulwa kwemiSebenzi, nje sesinamakhulukhulu weenkulungwana zabantu esele banelimuko lomsebenzi eliqakathekileko. Ubunengi babantwaba kulula ukubathola nge-SAYouth.mobi.

Sikhombela amabhizinisi ukuthi aqatjhe abantu abatjhaba abasandukuthola ilimuko lomsebenzi nabaphuma kilamahlelo abahlomise ngelimuko.

Abaqatjhi bangabona iHlelo le-Ofisi kaMengameli lokuKhuthaza ukuVulwa kwemiSebenzi njengekundla yokuthola ithalenta elitjha, sizakukghona ukubona amandla apheleleko waleligadango lamandla wokusungula eliyipumelelo ekulu. 